

ՋԵՌԱԳՐԵՐԻ ԴԱՍԱԿԱՐԳՄԱՆ ՓՈՐՁ ԸՍՏ ՄԱԿԱԲԱՅԵՑՈՑ ԳՐՔԵՐԻ

Բանասիր. գիտ. դոկտոր Հ. Մ. ԱՄԱԼՅԱՆ

Աստվածաշունչը բարդ, բնագրային համադրական ամբողջություն է, կազմված տարբեր ժամանակներում ապրած հեղինակների գրչին պատկանող գործերից: Կանոնական կամ արտականոն համարված գրքերի ու գրվածքների այդ ժողովածուն աչքի է ընկնում բովանդակության բազմազանությամբ, լեզվաոճական անմիօրինակությամբ, կանոնի անկայունությամբ և ամբողջ նյութի ներքին կառուցվածքով: Այդ երկի հայերեն թարգմանությունը հետադայում, XIII դարից սկսած, օժտվել է գրքերին առնթեր նախադրություններով, չլիսացանկերով, գլխաբաժանման նոր նիշերով և այլ գծերով: Եվ որպես այդպիսին, Աստվածաշունչը տարբերվում է հայերեն մյուս բոլոր միջնադարյան բնօրինակ ու թարգմանական գործերից թե՛ բնագրային և թե՛ արտաքին շատ հատկանիշներով: Հետևաբար, Աստվածաշնչի հայերեն թարգմանության ձեռագրերի դասակարգումն ըստ բոլոր հատկանիշների ղգալիորեն տարբերվում է սովորական, գլխավորապես զուտ բնագրային՝ ըստ խմբագրությունների ու դրանց տարբերակների կատարված դասակարգումից: Գրոց կանոնը, նախադրությունների, չլիսացանկերի, արտականոն գրքերի առկայությունը կամ բացակայությունը, գլխաբաժանման ու տնայտման տարբերությունները բուն բնագրի նկատմամբ հանդես են գալիս որպես արտաքին հատկանիշներ՝ կազմելով բնագրի արտաքին կողմի ամբողջությունը:

Ձեռագրերը կարելի է դասակարգել, իհարկե, հիմնվելով բնագրի նշված երկու հիմնական կողմերից թե՛ մեկի և թե՛ մյուսի վրա, ինչպես նաև այլ հանգամանքների հաշվառումով՝ հետադոտողի նպատակներին համապատասխան: Մինչդեռ լիարժեք գիտական դասակարգումը պետք է հիմնվի բազմաթիվ հատկանիշների վրա, հաշվի առնելով բնագրի ներքին՝ բուն բնագրային և արտաքին բոլոր հատկանիշները, որոնք, սակայն, համահավասար տարբերակիչ նշանակություն ու արժեք չունեն: Աղբյուրների բազմահատկանիշ դասակարգման համար մեզ հասած բոլոր ձեռագրերից (կամ դրանց մանրաժապավեններից) բացի անհրաժեշտ է ունենալ նաև գիտահամեմատական բնագրեր: Առանց վերջինների հնարավոր չէ ոչ միայն ձեռագրերի լիարժեք դասակարգում կատարել, այլև, առհասարակ, գիտականորեն լուծել Աստվածաշնչի սլատմական ու բանասիրական հարցերը կամ դրանք առնվազն հավաստի եզրակացությունների հանգեցնել:

Ընդհանուր ուսումնասիրությունները և մասնավորապես բնագրային համեմատությունները ի հայտ են բերում Աստվածաշնչի ձեռագրերի բազմապիսի տարբերություններ: Մակաբայեցոց գրքերը պարունակող ավելի քան ութսուն ձեռագրերից դժվար է ընտրել մի քանիսը, որոնք ըստ ամենայնի նույնական լինեն: Նույնիսկ ծագումնաբանորեն հարազատ ձեռագրերը երևան են հանում ուղղագրական ու գրչագրական հանգամանքների սահմաններից դուրս:

եկող տարբերություններ, ինչպես արտականոն գրվածքների առկայություն կամ բացակայություն, խորագրերի տարաձևություններ, գլխաբաժանման նշումների անմիօրինակություն և այլն:

Դա վկայում է հատկապես XII—XIII դդ. Աստվածաշնչի ընդօրինակման ուղղությամբ ծավալված աշխատանքի բազմակողմանիությունը, բնագրի ու կանոնի հարցերով զբաղվողների, գրիչների ու ծաղկողների, ինչպես նաև գրչագրական դպրոցների և օջախների բազմությունը:

Աստվածաշնչի ձեռագրերի գիտական դասակարգման հարցը բավական կնձռոտ է, դրա լուծումը բարդացնում ու խոչընդոտում են բնագրաբանական, ինչպես նաև այլ բնույթի մի շարք հանգամանքներ: Դրանք են գլխավորապես.

ա) Ձեռագրերի բազմությունը:

բ) Բնագրի խմբագրությունների, խմբագրական, սրբագրական ու գրչագրական զանազան տարբերակների առկայությունը:

գ) Ձեռագրերի ծագումնաբանական այլազանությունը՝ բնագրի տարբեր մասերի՝ տարբեր նախօրինակներից արտագրված լինելը:

դ) Տարբեր նախօրինակներից ծագող ձեռագրերից մեկը մյուսի միջոցով սրբագրելու և նմանեցնելու հանգամանքը:

ե) Նախագրությունների ու ցանկերի նախօրինակային կարգի փոփոխումները, որոնք արդյունք են այդ նյութերի նկատմամբ գրիչների համեմատաբար ազատ մոտեցման, երբեմն թելադրված տեղի արդյունավետ օգտագործման պահանջներից:

զ) Հին ձեռագրերի էջերում տեղ գտած հետագա ավելացումները, ջրնջումները և այլ միջամտումները:

է) Կանաչան նյութական թերություններով, անփուլթ ջնջումներով, խառնաշփոթ ուղղումներով ու սրբագրումներով և այլ պատճառներով պայմանավորված անընթեռնելի տեղերի առկայությունը ձեռագրերում:

ը) Թերթերի ու պրակների անհայտացման պատճառով բնագրի առանձին հատվածների ու մասերի բացակայությունը սի շարք ձեռագրերում:

թ) Շատ ձեռագրերի գրության ժամանակի, վայրի, գրչագրական դպրոցի անհայտությունը:

ժ) Բոլոր ձեռագրերի մի տեղում կենտրոնացված չլինելը և այլն:

Աստվածաշնչի հայերեն ձեռագրերի դասակարգման առաջին լուրջ փորձը կատարել է հայ մշակույթի գրավոր հուշարձանների լավագույն գիտակ Խ. Տեր-Մովսիսյանը՝ Աստվածաշնչի հայերեն թարգմանության պատմությանը նվիրված իր արժեքավոր մենագրության մեջ մի ընդարձակ բաժին հատկացնելով ձեռագրերին¹: Նա, իր աշխատության խնդիրներին համապատասխան, ձեռագրերի մանրամասն բնագրաբանական համեմատություններ չկատարելով, գիտահամեմատական բնագիր չկազմելով, այլև նման բնագիր ձեռքի տակ չունենալով, տվել է Աստվածաշնչի այն ժամանակ հայտնի բոլոր հայերեն ձեռագրերի դասակարգումը: Այդ աշխատանքը նա կատարել է ձեռագրերի արտաքին հանգամանքների ուշադիր քննումներով, համեմատումներով, ինչպես նաև ձեռագրերի գրչագրման ու պատմության կարևոր հարցերի լուսաբանու-

¹ Տե՛ս Մ. Тер-Мовсисян, История перевода Библии на армянский язык, СПб., 1902, էջ 76—185:

թյամբ: Հիմք ընդունելով բնագրի արտաքին հատկանիշները՝ գրոց կանոնը, նախադրություններն ու ցանկերը, արտականոն գրքերն ու գրվածքները և մասամբ այլ պարագաներ, Մ. Տեր-Մովսիսյանը Աստվածաշնչի հայերեն ձեռագրերը բաժանել է հինգ հիմնական խմբի:

1. Հին ձեռագրեր, որոնք չունեն Գևորգ Ավետարանի կաղմած նախադրություններն ու գլխացանկերը:

2. Ավետական խումբ. նախադրություններ ու գլխացանկեր ունեցող ձեռագրեր, որոնցում, Հ. Զոհրապյանի հրատարակած բնագրի համեմատությամբ, «Սողոմոնի իմաստությանը» հաջորդում է «Սիրաքը», «Դանիելի մարգարեությանը»՝ «Երեմիայի մարգարեությունը», «Կորնթացուց երկուրդ թուղթը» երբեմն գրվում է բոլոր թղթերից հետո: Ձեռագրերի մի մասն ունի «Հանգիստ Յովհաննու»:

3. Նախադրություններ և գլխացանկեր ունեցող ձեռագրեր, որոնք ունեն «Հանգիստ Յովհաննու», չունեն «Սիրաք», «Դանիելի մարգարեությունը» գալիս է «Երեմիայի մարգարեությունից» հետո: Մի քանի ձեռագրերում «Հոբբը» սաղմոսներից առաջ է:

4. Ձեռագրեր, որոնք բացի նախադրություններից ու գլխացանկերից, ունեն նաև տասներկու նահապետների կտակները, Հովսեփի և Ասանեթի պատմությունը: Դրանցում «Եղրի Գ»-ն գրված է «Եղրի Բ»-ից կամ կտակներից կամ էլ Մակաբայեցոց գրքերից հետո:

5. Ղաղար Բաբերդցու կաղմած բնագրի ձեռագրերը, որոնք, բացի նախադրություններից և գլխացանկերից, ունեն կաղմողի առաջաբանը, բոլոր արտականոն գրքերը, կանոնի աղյուսակները և գրոց բառերի այբբենական ցանկը:

Այդ ընդհանուր դասակարգումը, իր թերություններով հանդերձ, կարևոր նշանակություն է ունեցել (և այսօր էլ ունի) Ս. Գրոց բնագրի ու սլաւոնական ուսումնասիրության համար: Իր դասակարգման մասին, միանգամայն տեղին ու իրավացի կերպով, Մ. Տեր-Մովսիսյանը գրում է. «Ըստ արտաքին հատկանիշների այսպիսի խմբավորումն անկասկած կարող է նշանակալիորեն թեթեւացնել բուն բնագրի համեմատության և հասկացման գործը: Ես գտնում եմ, որ չի կարելի բավականանալ նշված արտաքին հատկանիշներով և դրանց վրա հիմնվելով՝ ձեռագրերն այս կամ այն խմբին վերագրել և որ հնաշավոր են դեպքեր, երբ ձեռագիրն իր արտաքին կաղմով պատկանի մի խմբի, իսկ ըստ բնագրի պետք է վերագրվի ուրիշ խմբի»²:

Ստորև փորձ է արվում Աստվածաշնչի ձեռագրերը դասակարգել նոր սկզբունքով ու դրա կիրառման յուրատեսակ եղանակով: Տարիներ առաջ, Մաշտոցի անվան Մատենադարանի տնօրինության հանձնարարությամբ, մենք ձեռնարկեցինք Աստվածաշնչի Մակաբայեցոց գրքերի քննական բնագրի ստեղծման աշխատանքը: Մատենադարանի և արտասահմանյան ավելի քան 80 ձեռագրերից ընտրված 40 ձեռագրերի լրիվ և Աստվածաշնչի 3 տպագիր օրինակների³ մասնակի համեմատության միջոցով կազմվեցին Մակաբայեցոց

² Նույն տեղում, էջ 181—182:

³ Աստուածաշունչ Հնոց և Նորոց կտակարանաց, Սմատերդամ, 1666: Աստուածաշունչ մատեն Հին և Նոր կտակարանաց, Վենետիկ, 1805: Գիրք Աստուածաշունչը Հին և Նոր կտակարանաց, Վենետիկ, 1860:

գրքերի գիտահամեմատական բնագրերը: Մեր խնդիրներից մեկն էլ ձեռագրերի գիտական դասակարգումն էր, որի համար քննական բնագրի մեջ ընդգրկված ձեռագրերից բացի, առանձին, 10—15 տուն պարունակող հատվածներով համեմատվեցին նաև մյուս ձեռագրերը: Դասակարգման համար ընտրվեցին Մակաբայեցոց Ա և Բ գրքերի սկզբի, մեջտեղի և վերջի հատվածները, Գ գրքի սկիզբը և վերջին (է) գլուխն ամբողջությամբ: Այդպիսով ձեռքի տակ եղան 75 ձեռագրերի և մեկ տպագրության (1666 թ.) վերահիշյալ հատվածների տարրնթերցվածները: Սակայն եղած նյութը բավարար չհամարվեց նախատեսված դասակարգման համար: Ուստի կազմվեցին նաև բնագրերի արտաքին նկարագիրն ու գոչագրական հանգամանքները պատկերող քարտեր՝ հետևյալ փաստաթղթի գրանցումով: Օ-աւ, է-ե գրությունները, թվականների՝ համապատասխան տառերով, դրանց ղուգորդումներով և բառերով գրությունները, գրված խաբաժանման ֆո (ֆռանգաց) համառոտագրությունը, միջտողային ու լուսանցային սրբագրումների ու ավելացումների առկայությունը, Մակաբայեցոց գրքերի տեղը տվյալ ձեռագրում, ինչպես նաև առառատեսակները, գրի ընթեռնելիության աստիճանը և այլն: Քարտերի մյուս էջում նշվեցին Աստվածաշնչի ամբողջ կանոնը, նախադրություններն ու գլխացանկերը, արտականոն յրքերն ու գրվածքները: Քարտերից բացի ձեռքի տակ էր նաև ձեռագրացույցակներից բաղված տեղեկատու ցանկը, որտեղ ձեռագրերի դիմաց նշված է դրանց պայմանական նիշն ըստ Ա. Զեյթունյանի աշխատության⁴, գրության յամանակը, վայրը, գրիչը, նյութական վիճակը, պահպանության վայրը և այլն:

Ներքևում տրվող դասակարգումը հիմնված է բնագրային ու ձեռագրական բոլոր էական հատկանիշների վրա: Ձեռագրերը խմբվում են աստիճանաբար, հաշվողական տվյալների հիման վրա: Դասակարգման եղանակը հաշվողական է կոչվում, որովհետև բուն բնագրին վերաբերող հատկանիշները՝ տարրնթերցվածները, հաշվի են առնվում քանակային հարաբերություններով, դրանց ամբողջությունը յուրաքանչյուր ձեռագրում գիտվում է որպես անդամների սրոշակի թիվ ունեցող բաղմություն: Ընդ որում, վերջնական դասակարգումը աստացվում է մեկը մյուսով պայմանավորված հաջորդական գործողութային ընդհանուր արդյունքը ձեռագրերի արտաքին հատկանիշների հետ բաղդատելուց հետո: Սակայն մեր դասակարգումը, եթե ոչ իր սկզբունքով ու կատարման եղանակով, ապա ըստ հատկանիշների ծավալային ընդգրկման, այնուամենայնիվ, միակողմանի է: Նախ, ծավալային առումով համամասնություն չկա դասակարգման երկու հիմնական կողմերի միջև. արտաքին հատկանիշները հաշվի են առնվում Աստվածաշնչի ամբողջ բնագրում, մինչդեռ բնագրային փաստերը վերցվում են միայն Մակաբայեցոց գրքերի առանձին հատվածներից: Ապա, փաստորեն դասակարգվում են միայն Մակաբայեցոց գրքերն ունեցող ձեռագրերը և դա համարվում է Աստվածաշնչի ձեռագրերի դասակարգում առհասարակ, այն դեպքում, երբ տեսադաշտից դուրս են մնում այն բոլոր ձեռագրերը, որոնք չունեն Մակաբայեցոց գրքերը: Մինչդեռ ըստ ամենայնի լիարժեք գիտական դասակարգման համար անհրաժեշտ է օգտագործել բոլոր

⁴ Ա. Զեյթունյան, Աստվածաշնչի հայերեն թարգմանության ձեռագրական միավորները: դասակարգման մասին, «Բանբեր Մատենադարանի», № 12, 1977, էջ 295—304, Աստվածաշնչի Ոսկան երկանցու հրատարակությունը (1666 թ.) նշանակված է լատինական Ձ տառով:

ձեռագրերը, ձեռքի տակ ունենալով Աստվածաշնչի, եթե ոչ բոլոր, ապա գոնե շին և նոր կտակարանների մի քանի գրքերի գիտահամեմատական բնագրերը:

Դասակարգման մեր հիմնական սկզբունքն է ձեռագրերը խմբավորել ըստ բնագրային հատկանիշների, ապա ձեռագրախմբերն ստուգել ու նշգրտել ըստ բնագրի արտաքին հատկանիշների:

Դասակարգման համար ընտրված բնագրային հատվածների տարընթերցվածները բաժանված են երկու հիմնական խմբի. ա) խմբագրական նշանակություն ունեցող տարընթերցվածներ՝ հիմք բնագրի համեմատությամբ, բառային, բառակապակցական, ոճական, շարագասական շեղումներ, հետագա կարևոր ավելացումներ և սրբագրումներ, բ) խմբագրական տեսակետից չեղոք տարընթերցվածներ՝ հոգերի ու նախդիրների սխալ գործածություն, չհղովված գերանուններից հետո յ-ի գրություն, երկձևություններ ու ձևաբանական այլ շեղումների դրսևորումներ, այլև գրչագրական սխալներ ու վրիպումներ, պատահական բացթողումներ ու աղավաղումներ և այլն⁵:

Որպես տարբերակիչ հատկանիշներ հաշվի են առնվում առաջին կարգի՝ խմբագրական բնույթի, տարընթերցվածները, որոնց թիվը մեր ընտրած հատվածներում 82 է: Դրանք, ըստ բնագրային հաջորդականության, դասավորելով ձախ կողմում, ուղղահայաց շարքով, վերևում հորիզոնական շարքով դասավորված ձեռագրանիշերի ուղղահայաց սյունակներում տարընթերցվածների առկայությունը և բացակայությունը՝ և—սիմվոլներով նշելով՝ ստանում ենք մի առադրական տախտակ: Համապատասխան սյունակների վերջում գրանցելով նշույթավոր (+ նշան ունեցող) տարընթերցվածների (այսուհետև՝ ՆՏ) և տարընթերցվածների ընդհանուր քանակը ջուլց տվող թվերը՝ արդեն կարող ենք գործողություններ կատարել ձեռագրերի զուգորդումներով: Տախտակը, որ առաջին հայացքից ընդհանուր պատկերացում է տալիս բնագրերի մասին, հիմք է հետագա գործողությունների համար:

Առադրական տախտակից պարզվում է, որ վեցված 82 տարընթերցվածներից ՆՏ թիվը ձեռագրերում տատանվում է 2-ից 48-ի միջև:

$C_5F_9O_1$ ձեռագրերն ունեն 2, իսկ J_6 -ը՝ 48 ՆՏ, հիմք բնագրից չեն շեղվում 4 ձեռագրեր՝ $E_2L_3N_1O_6$ որոնք, հետևաբար, ունեն գրո ՆՏ: Ըստ ՆՏ մենք տեսնում ենք ձեռագրերի հարաբերությունը հիմք բնագրի հետ: Պետք է նաև որոշել ձեռագրերի՝ միմյանց հետ ունեցած հարաբերությունը: ՆՏ թիվը ձեռագրերի նմանության ցուցանիշ չէ, որովհետև տարբեր քանակով կամ հավասար թվով ՆՏ ունեցող ձեռագրերը կարող են չունենալ համընկնում, այսինքն չունենալ ընդհանուր տարընթերցվածներ: Ձեռագրերի նմանությունը

5 Մ. Ստոունը, փորձելով նախի գրքի հին հայերեն ձեռագրերի համեմատության միջոցով որոշել հրատարակության համար հիմք բնագիրը, տարբերում է 4 կարգի տարընթերցվածներ՝ ուղղագրական տարբերակներ (spelling variants), ալիհայտ աղավաղումներ (clear corruptions), չեղոք տարբերակներ (indifferent variants) և խմբագրական տարբերակներ (versional variants): Տե՛ս Michael E. Stone, The old armenian version of Isaiah: towards the choice of the Base Text for an Edition: Textus Annual of the Hebrew University Bible project, vol. VIII, Jerusalem, 1973, էջ 109.

6 Ձեռագրերի դասակարգման համար, որպես տարբերակիչ հատկանիշներ, կարևոր են խմբագրական բնույթի տարընթերցվածները: Ուստի մյուս բոլոր տարընթերցվածները, անկախ գրանց ընդթից, մենք համարում ենք խմբագրական տեսակետից չեղոք:

որոշելու համար պետք է վերցնել ընդհանուր տարրնթերցվածները յուրաքանչյուր պուլզ ձեռագրի համար:

Ուստի, շարունակելով գործողությունները, անհրաժեշտ է առադրական տախտակի հիման վրա կադմել համընկնումների տախտակը՝ զուգորդությունների միջոցով: Մեր վերցրած 76 աղբյուրների համար կունենանք 2850 զուգորդություն: Ինչպես տեսնում ենք, ստացվում է զուգորդությունների մի ընդար-

Հա.	H3	Po	93	Uo	I1	Co	No	H4	91	95	76	ՆՏ
H3		10	10	11	14	9	9	11	10	10	10	18
Po	10		7	9	10	8	11	12	11	13	13	18
93	10	7		18	14	11	17	17	18	17	18	22
Uo	11	9	18		20	12	20	18	24	22	23	26
I1	14	10	14	20		17	23	13	29	24	29	31
Co	9	8	11	12	19		22	22	21	30	23	34
No	9	11	17	20	23	22		32	33	33	33	40
H4	11	12	17	18	13	22	32		35	30	35	41
91	10	11	18	24	25	21	33	35		39	39	43
95	10	13	17	22	24	20	33	30	39		38	44
76	10	13	18	23	23	23	35	35	39	38		48
ՆՏ	18	18	22	26	31	34	40	41	43	44	48	

ձակ տախտակ, որը հարմար չէ այստեղ բերել: Անհրաժեշտության դեպքում կարելի է նման տախտակներ կադմել ձեռագրային առանձին խումբերի համար: Ահավասիկ մի այդպիսի մասնավոր զուգադրական տախտակ ձեռագրախմբերից մեկի համար: Վանդակներում գրված է համապատասխան զուգորդների ՆՏ համընկնումների թիվը, իսկ ներքևի և աջ կողմի վերջին սյունակների վանդակներում՝ ձեռագրերի ՆՏ ընդհանուր թիվը: Ձեռագրերը դասավորված են ըստ ՆՏ թվերի աճման կարգի:

Այս աղյուսակի տվյալների համաձայն կարելի է արդեն առանձնացնել իրար նման ձեռագրեր ըստ բերված թվերի՝ ըստ համընկնումների. որքան մեծ է համընկնումը, այնքան մոտ կամ հարադատ են ձեռագրերը: Օրինակ G_1 և G_3 ձեռագրերը, որոնք ունեն համապատասխանաբար 45 և 44 ՆՏ և 39 համընկնում, նման են, ծագում են միևնույն աղբյուրից կամ դրանցից մեկն ընդօրինակված է մյուսից: Սակայն համընկնումը ձեռագրերի նմանության վերջնական ցուցանիշ չէ, որովհետև ձեռագրերի նմանությունը ցույց է տալիս միայն ուստ ՆՏ, ըստ հատկանիշների ընդհանրության, առանց դրանց տարբերությունների հաշվառման: Մինչդեռ ձեռագրերի իրական նմանությունը, որի թվային արտահայտությունն անվանում ենք նմանության ցուցիչ (այսուհետև՝ ՆՑ) ստանում ենք և՛ համընկնումների, և՛ տարբերությունների միաժամանակյա հաշվառումով:

Ձեռագրերի բացարձակ նմանություն կունենանք ՆՏ և համընկնման թվերի հավասարության դեպքում: Մնացած դեպքերում, երբ նման հավասարություն չկա, ՆՑ ստանալու համար գործ ունենք ՆՏ և համընկնման թվերի հարաբերությունների հետ, դրանով իսկ հաշվի առնելով ձեռագրերի

և՛ նմանությունները, և՛ տարբերությունները, որոնց ամբողջությունը արտահայտվում է ՆՅ մեջ: Վերջինս ստանում ենք հետևյալ կերպ. m և n թվով ՆՏ ունեցող A և B ձեռագրերի k համընկնման դեպքում կունենանք

$$\frac{k}{M} \text{ և } \frac{k}{N} \text{ : համընկման և ՆՏ թվերի հարաբերությունը արտահայտող այդ}$$

կոտորակներն անվանում ենք նմանության մաս: Երկու ձեռագրերի նմանության մասերի հարաբերությունը այդ ձեռագրերի ՆՏ թվերի հարաբերու-

$$\text{թյունն է, այսինքն՝ } \frac{k}{M} : \frac{k}{N} = \frac{N}{M}, \text{ որն անվանում ենք նմանության}$$

գործակից (այսուհետև՝ ՆԳ): ՆՅ հավասար է ՆԳ և համընկնման արտադրյա-

$$\text{լին, այսինքն՝ } \text{ՆՅ} = \frac{N}{M} \cdot k: \text{ Այս բանաձևից հետևում է, որ ՆՅ եր-}$$

բեք չի կարող մեծ լինել համընկնման թվից և դրա սահմանը k -ն է ՆՏ

$$\text{հավասարության դեպքում, երբ } \frac{N}{M} = 1: \text{ Մյուս բոլոր դեպքերում ՆՅ}$$

փոքր է k -ից, երբ ՆՏ թվերը հավասար չեն և ՆԳ կոտորակային թիվ է: Հաշվումների ժամանակ, հետևաբար, հարմար է ՆՏ փոքր թիվը բաժանել մեծի վրա, հակառակ դեպքում հաշվումները կձգձգվի միջակա գործողություններով: ՆՅ ուղիղ համեմատական է ՆՏ մեծությունը: Հաշվենք, օրինակ, հիշա-

$$\text{տակված } G_1 \text{ և } G_5 \text{ ձեռագրերի ՆՅ, որը հավասար է } \frac{44}{43} \cdot 39 \approx 38 \text{ (0,5-ից փոքր)}$$

կոտորակային մասի անտեսումով): Այդպես կարող ենք հաշվարկել ձեռագրերի բոլոր զույգերի ՆՅ և, համընկնումների տախտակի նման, կազմել ՆՅ տախտակը:

Ձեռագրերի նախնական խմբերը առանձնացնում ենք ՆՏ թվերի օգնությամբ. թվերը դասավորելով աճման կարգով՝ ստացված թվաշարքը հաջորդաբար կիսելով բաժանում ենք հատվածների՝ ՆՏ թվերի դիմաց գրելով համապատասխան ձեռագրանիշերը: Թվաշարքի հատվածներն ընդունում ենք որպես ձեռագրերի պայմանական խմբեր: Ապա համընկնումների և ՆՏ միջոցով ձգորտում ենք ձեռագրերի քաշխումն ըստ խմբերի: Թվերին նայելով, առանց դժվարության կարելի է տեսնել, թե ձեռագրերը կարող են թողնվել կամ չթողնվել տվյալ պայմանական խմբում: Կողմնորոշման համար մոտավորապես ընդունում ենք, որ եթե ձեռագրերի համընկնումը պակաս է դրանց ՆՏ կեսից, այսինքն՝ տվյալ ձեռագրի համար նմանության մասը փոքր է 0,5-ից, ապա այդ ձեռագրի պատկանելությունը տվյալ պայմանական խմբին որոշակի չէ: Ուստի այդ ձեռագիրը պետք է համեմատել նախ հարևան, ապա մյուս խմբերի ձեռագրերի հետ և որոշել դրա տեղն ըստ ՆՅ ամենամեծ թվի:

Ձեռագրախմբերի որոշումից հետո մնում է բաժանումներ կատարել այդ խմբերի ներսում, ցույց տալ ձեռագրերի ծագումնաբանական կապը, դրանց
 5 Հանդես, № 4

մոտիկության կամ նմանության աստիճանը: Դա կատարվում է արդեն ձևա-
պրերի զուգորդումով՝ ՆՑ ճշգրիտ հաշվարկումների միջոցով: Նախնական
խմբերը որոշելիս ՆՑ մենք հաշվեցինք որպես սկզբնական, իդեալական վի-
ճակ ընդունված հիմք բնագրի համեմատ, որի ՆՑ=0: Այժմ, ներխմբային
դասդասման համար, որպես սկիզբ, որպես տվյալ խմբի համար հիմք ընդու-
նում ենք այն ձևագիրը, որն ավելի փոքր թվով ՆՑ ունի: Խմբում միևնույն
թվով փոքր ՆՑ ունեցող մեկից ավելի ձևագրերի առկայության դեպքում
հիմք ենք ընդունում այդ ձևագրերից հնագույնը, որով և սկսում ենք զու-
գորդումները: Հաշվարկում ենք ՆՑ բոլոր զույգերի համար: Հիմք ձևագրից
հետո դնում ենք այն ձևագիրը, որն ամենամեծ ՆՑ ունի այդ ձևագրի հետ,
այսինքն՝ այդ երկրորդ ձևագրի հետ ամենամեծ ՆՑ ունեցող ձևագիրը և այդ-
պես մինչև վերջ: Հարմար է ձևագրախմբի համար զուգորդումները կատարել
հիմք ձևագրի հաջորդական բացառումով՝ զուգորդությունների փոքր շարքեր
ստանալու համար, երբ յուրաքանչյուր հաջորդ շարք սկսվում է նախորդ շար-
քից որոշված նոր հիմք ձևագրով: Օրինակ՝ ABCDEF խմբի համար կունե-
նանք հետևյալ շարքերը.

[A]BCD(E)F
[E]BC(D)F
[D](B)CF
[B]C(F)
[F](C)
[C]⁷

Ուրեմն վերոհիշյալ խմբի ձևագրերը պետք է դասավորվեն AEDBFC
կարգով: Աշխատանքը թեթևացնելու համար ձևագրանիշերը պետք է շարնչ
բստ ՆՑ աճման: Փոքր համընկնում ունեցող զույգերի համար կարելի է նե-
շահավարկել: Միևնույն թվով ՆՑ և հավասար համընկնում ունեցող զույգերից
ՆՑ բավական է հաշվել միայն մեկ զույգի համար: Նպատակահարմար է
խմբերի ներսում առանձնացնել քանակով մոտ ՆՑ ունեցող ձևագրերի
ենթախմբեր և, դրանց միավորների ՆՑ հաշվարկումներից հետո, ամփոփելով
տալ ամբողջ խմբի ընդհանուր պատկերը:

Ձևագրախմբերում ՆՑ թվերի հետազոտության միջոցով ուրվագծվում
են բնագրերի 3 հիմնական տիպեր.

ա) նույնական բնագրեր, երբ մեկը արտագրված է մյուսից և ՆՑ հա-
վասար է համընկնմանը կամ դրանից շեղվում է նվազագույն (1-ի) տարբե-
րությամբ:

բ) Մեկը մյուսից ծագող, բայց նույնությամբ չարտագրված բնագրեր,
որոնց ՆՑ մոտ է համընկնմանը՝ 2—3-ի տարբերությամբ:

դ) Մեկ ընդհանուր, անհայտ նախորինակից ծագող բնագրեր, որոնց

⁷ Անկյունավոր փակագծի մեջ առնված է հիմք ձևագիրը նշող տառը, իսկ փոքր փա-
կագծում՝ առաջինի հետ ամենամեծ ՆՑ ունեցող ձևագրի նիշը, որը զրվելու է հաջորդ շարքի
սկզբում:

և 3-ով (և ավելի) է տարբերվում համընկնումից, բայց պակաս չէ դրա վերինը:

Այս հիմնական բնագրերն էլ կարող են ունենալ իրենց վանազան տարբերակները:

Ձեռագրերի դասակարգումն ավարտվում է ըստ բնագրային հատկանիշների որոշված խմբերը ձեռագրերի արտաքին հատկանիշների հաշվառումով ստուգելուց, հնարավոր փոփոխություններ ու ճշգրտումներ կատարելուց հետո:

Սակայն այդ վերջնական գործողություններից առաջ ըստ բնագրային հատկանիշների վերևում կատարված, դեռևս ավարտուն չհամարվող դասակարգումը մենք շտապեցինք համեմատել Մ. Տեր-Մովսիսյանի՝ ըստ ձեռագրերի արտաքին հատկանիշների կատարված դասակարգման հետ, ձեռագրախմբերի, եթե ոչ լրիվ, ապա գոնե ընդհանուր համապատասխանության ակնկալությամբ: Համեմատության արդյունքը սպասածից ավելի գոհացուցիչ էր և, բնականաբար, ոգևորիչ: Ուրեմն, կարելի էր վստահորեն կատարել վերջին քայլը՝ ձեռագրախմբերը ճշգրտել ըստ բնագրերի արտաքին հատկանիշների՝ գրոց կանոնի, նախադրությունների, գլխացանկերի, ղխաբաժանման, արտականոն գրքերի ու գրվածքների, տարբերակվածների ժամանակագրության, իսկ առանձին դեպքերում նաև ըստ այլ հատկանիշների:

Վերջապես, վերևում նկարագրված բաղմահատկանիշ դասակարգման եղանակի կիրառումով Աստվածաշնչի հայերեն թարգմանության ձեռագրերը որոշակի կերպով բաժանվեցին չորս հիմնական խմբի.

I խումբ (5—24 նՏ)—B, C, C₂, C₆, D₃, D₈, E₄, E₀, F₅, F₆, G₀, G₀, H₂, I₃, K₆, K₇, K₈, L₂, L₄, L₅, M₁, M₂, M₀, N₂, O₂, O₉, P₇, P₈, Q₁, R₁, R₈, S₂, S₈, T₄, T₀, V₆, V₇, V₈ a (39 ձեռագիր).

II խումբ (5—12 նՏ)—C₅, I₅, J₃, L₈, N₀, O₃, O₇, O₈, P₁, P₃, P₆, P₉, Q₂, Q₅, R₁, R₃, R₆, T₃, U₂ (19 ձեռագիր).

III խումբ (0—4 նՏ)—E₂, F₇, F₉, L₃, N₁, O₁, O₆ (7 ձեռագիր).

IV խումբ (22—48 նՏ)—C₈, G₁, G₃, G₅, H₃, H₄, I₁, J₈, N₆, P₀, U₆ (11 ձեռագիր):

Ձեռագրերի այդ խմբերը, որ համապատասխանաբար ունեն 16, 8, 1, 32 միջին նՏ, իրարից անկախ են և դրանց հավասար կամ մոտ թվով նՏ ունեցող ձեռագրազույգերի նՅ շատ փոքր է կամ հավասար է զրոյի:

Դասակարգման ամբողջ ընթացքում պետք է նկատի ունենալ.

ա) Բնագրերի համեմատության, առադրական տախտակների կազմության, տարբերակվածների համընկնումների, նՅ հաշվարկումների և այլ գործողությունների ընթացքում հնարավոր սխալները և վրիպումները, որոնք կարող են անդրադառնալ աշխատանքի ճշտության վրա:

բ) Թվերի կլորացումը (տասնորդական մասերի ամբողջացումով կամ անտեսումով) էական նշանակություն չունի, մանավանդ երբ ձեռագրերի տարբերությունն ակնհայտ է նՅ ամբողջ թվերից:


գ) ՆՏ 1—2, իսկ առանձին դեպքերում նաև 3—4 տարբերությունը, ձեռագրերի մյուս հատկանիշների նույնության կամ մոտիկության դեպքում նույնպես էական նշանակություն չունի:

դ) Հետազոտություններից պարզվում է, որ ձեռագրերի ժամանակագրական կարգը համապատասխանում է դրանց ՆՏ թվերի աճող շարքին, այսինքն՝ դրանք ուղիղ համեմատական են: Հետևաբար ըստ ՆՑ դասակարգված նման և ծագումնակից ձեռագրերի սխեմաներում հորիզոնական (մասամբ նաև ուղղահայաց) շարքերում պետք է պահպանվի ձեռագրանիշերի այբբենականությունը: Այդ շարքերում նախորդ ձեռագրի ՆՏ թիվը պետք է փոքր (կամ հավասար) լինի հաջորդ ձեռագրի ՆՏ թվից: Հակառակ դեպքում, եթե ՆՏ տարբերությունը մեծ չէ, ՆՏ թվերից հաջորդի մեծ լինելը նախորդից չպիտի դիտվի որպես անկանոնություն, որովհետև ձեռագրերի ժամանակագրական կարգի ու ՆՏ շարքի համապատասխանությունը, այնուամենայնիվ, խիստ ու անխախտելի օրինաչափություն չէ: Հնարավոր է, որ գրիչը ձեռագիրն ընդօրինակեր նախօրինակի սխալների տև վրիպումների ուղղումներով, այլև սրբագրումներով, դրանով իսկ նվազեցնելով նոր ձեռագրի ՆՏ թիվը: Այդուհանդերձ չի բացառվում նաև գրիչի կողմից թույլ տրված նոր սխալների ու վրիպումների հավանականությունը:


ե) Բնագրերում հետագա անձանց կողմից կատարված բոլոր կարգի միջամտությունները՝ ավելացումները, անփույթ ջնջումները, տեղնուտեղը կատարված դժվարընթեռնելի ուղղումները և այլն, մեծապես դժվարացնում են տարրնթերցվածների ճշտությամբ որոշելը: Նման դեպքերում սյահանջվում են լրացուցիչ պրպտումներ, բանասիրական փորձ ու հմտություն և անորոշությունները գնահատելու համապատասխան մոտեցում: Այսպես, մի շարք ձեռագրերում պարզ երևում է, որ լուսանցքային ՖՌ (Ֆոանգաց) գլխանիչը ավելացված է հետագայում, երկրորդ գրիչի ձեռքով: Ուրեմն, եթե այդ ձեռագիրն իր բոլոր հատկանիշներով մոտ է այնպիսի ձեռագրերի, որոնք չունեն ՖՌ գլխանիչը, ապա վերջինս տարբերակիչ նշանակություն չպիտի ունենա այդ ձեռագիրը համեմատվող մյուս ձեռագրերի հետ մի խմբում դասելու համար:

Դասակարգման վերևում կիրառված սկզբունքներից շեղվող երևույթների մեծ մասը պայմանավորված է դարերի ընթացքում հայերեն ձեռագրերի կրած փոփոխություններով: Հետաքրքիր է, որ աշխատանքի ընթացքում, շատ հաճախ, հաշվարկումներն ուղղակիորեն կռահել են տալիս այդ շեղումները տակ թաքնված իրողությունները, դրանով իսկ օգնում ճշգրտելու դասակարգումը և հաստատելու սկզբունքը:

Ստորև բերվում են Աստվածաշնչի հայերեն թարգմանության Մակաբայեցոց գրքերն ունեցող ձեռագրերի դասակարգման սխեմաներն ըստ խմբերի: Նախօրինակից անմիջականորեն ծագող ձեռագիրը դրվում է աջ կողմում, հորիզոնական գծիկից հետո, ապա հաջորդում են մյուս ձեռագրերն ըստ ՆՑ աճող թվերի: Մնացած ձեռագրերը դասավորված են ներքևում, ուղղահայաց շարքով, ՆՏ թվերի աճման կարգով: Նույնական ձեռագրերի միջև գծիկ չի դրվում: Հորիզոնական շարքերում ձեռագրերի հաջորդական կարգը համապատասխանում է դրանց ժամանակագրական կարգին: Ձեռագրերի ենթադրվող, սնհայտ, նախօրինակները նշանակված են շրջանագծով:



Աստվածաշնչի աղբյուրների ընդհանուր սխեման կլինի.



Ձեռագրախմբերից առաջին երեքն ինքնուրույն են և ծագում են Աստվածաշնչի բնօրինակի տարբեր օտար խմբագրություններից, իսկ չորրորդ խումբը ծագում է հայերեն ձեռագրերի առաջին խմբից:

Եզրակացություններ.

1. Երեք զուգահեռ, իրարից անկախ ձեռագրախմբերի առկայությունը վկայում է, որ V դ. Աստվածաշնչը հայերեն է թարգմանվել հավանաբար տարբեր օտար բնօրինակներից՝ տարբեր օտար խմբագրություններից: Ճշտությամբ չենք կարող ասել (և այդ ասելը դուրս է հոգվածիս նպատակից),

թե ձեռագրերի առաջին երկու խմբերից որն է հունարենից և որը ասորերենից, ավագ թարգմանիչների կողմից թարգմանված հայերեն նախօրինակներից սերվում: Մինչդեռ երրորդ խմբի ձեռագրերը հանդիսանում են 431 թ. հետո, կրտսեր թարգմանիչների կողմից Կոստանդնուպոլսից բերված հունարեն օրինակի, յոթանասնից կոչվող խմբագրության հայերեն թարգմանության հետագա բնդօրինակություններ:

2. Երրորդ խմբի $O_1F_7F_9$ ձեռագրերը ուղղակի կապ չունեն այդ խմբի մյուս ղրո ՆՏ ունեցող ձեռագրերի հետ: Դրանք, հավանաբար, Աստվածաշնչի յոթանասնից կոչվող խմբագրության հայերեն հնագույն թարգմանության բնդօրինակություններն են, որոնք առանձին խումբ չեն կարող կազմել և երրորդ խմբի մեջ են մտցվել պայմանականորեն, փոքր թվով ՆՏ ունենալու պատճառով:

3. Խմբերի ներսում արտաքին հատկանիշներով տարբերվող ձեռագրերը մեծ մասամբ ծագում են անհայտ նախօրինակներից: Պետք է ենթադրել, որ ավելի խմբին ոչ բնորոշ հատկանիշները հիմնականում հին ձեռագրերում կատարված հետագա միջամտումների արդյունք են:

4. Ձեռագրերի խմբագրական, սրբագրական ու գրչագրական տարբերությունները շատանում և ակնառու են դառնում XIII դարից սկսած, կապվելով գլխավորապես Գևորգ Սկևռացու և նրա հետևորդների կողմից Աստվածաշնչի կանոնում կատարված փոփոխումների, նախադրությունների ու գլխացանկերի ավելացման և մասամբ էլ հայերեն թարգմանությունը լատինական օրինակի համեմատությամբ սրբագրելու հետ: Նախադրությունների ու գլխացանկերի կարգի անմիջօրինակությունը միտում է ենթադրելու, թե Գևորգ Սկևռացին չէ բոլոր նախադրությունների ու գլխացանկերի հեղինակը, դրանց մի մասը թերևս կազմված է հետագայում, անհայտ անձանց կողմից:

5. Մ. Տեր-Մովսիսյանը հիմնականում ճիշտ է դասակարգել Աստվածաշնչի հայերեն ձեռագրերը ըստ դրանց արտաքին հատկանիշների: Նրա առանձնացրած հինգերորդ խմբի ձեռագրերը՝ Ղազար Բաբերդցու առաջաբանով, անատումով, բոլոր արտականոն գրքերով, կանոնի աղյուսակով ու բացանկով հանդերձ, բնագրային տեսակետից առանձին խմբագրություն չեն ներկայացնում, հետևաբար մեր դասակարգման մեջ, ըստ իրենց հատկանիշների ամբողջության, առանձին ձեռագրախումբ չեն կազմում:

6. Դասակարգման համար ընտրված 82 խմբագրական բնույթի տարբերություններից շուրջ 30-ը, ըստ ձեռագրերի գրության ժամանակների, հանդես են եկել XIII դարում, գլխավորապես շորրորդ խմբի ձեռագրերում:

Մի շարք տարբերություններ էլ, որոնք վերևում համարվեցին խմբագրորեն չեզոք, հանդես են գալիս XVI—XVII դդ. և վերաբերում են առաջին և երկրորդ խմբի ձեռագրերին: Այդ կարգի տարբերությունները, դասակարգման ընթացքում հաշվի են առնվել հաղվագյուտ դեպքերում: XVI—XVII դդ. արդեն գրեթե գոյություն չունեն Աստվածաշնչի բնագրերում փոփոխություններ կատարելու նախկին սովորույթը և այդ շրջանի ձեռագրերը աչքի են ընկնում գլխավորապես ուղղագրական ու գրչագրական առանձնահատկություններով:

7. Չորրորդ խմբի ձեռագրերը մեծ մասամբ ծագում են առաջին խմբի ձեռագրերից կամ դրանց նախօրինակներից: Այդ երկու խմբի ձեռագրերը չունեն ֆո գլխանիշը և, ինչպես նշում է Մ. Տեր-Մովսիսյանը, ֆոանգալից

զիսաբաժանումն առհասարակ հատուկ չէ հնագույն բնագրերին, մեր դասակարգումով՝ երրորդ և չորրորդ խմբերի բոլոր ձեռագրերին և առաջին խմբի ձեռագրերի մի մասին: Երկրորդ խմբի ձեռագրերը, որոնք ունեն ֆո ալտանի-շը, հիմնականում վերաբերում են XVII դարին:

Աստվածաշնչի ձեռագրերի վերը տրված դասակարգումը, հնչյուն արգեն նշվել է, վերջնական ու անթերի չի կարող լինել: Այն կարող է փոփոխվել զիտահամեմատական նոր բնագրերի, ինչպես նաև նորահայտ ձեռագրերի փաստերի հիման վրա, դառնալով ավելի հավաստի ու կայուն: Դասակարգման եզանակը, որ կարելի է կիրառել թերևս նաև այլ դասակարգումներ կատարելու համար, ընդհանուր ճանաչում ստանալ բնավ չի հավակնում, այլ սուրբում է մասնագետների կարծիքներին և առաջարկներին:

ОПЫТ КЛАССИФИКАЦИИ РУКОПИСЕЙ НА ОСНОВЕ КНИГ МАККАВЕЙСКИХ

Доктор филол. наук Г. М. АМАЛЯН

(Резюме)

Классификация рукописей армянского перевода Библии имеет важное значение для составления его критического текста. На основе сличения 75 рукописей Книг Маккавейских в статье делается попытка классификации рукописей с учетом всех существенных признаков. Применены вычислительные способы учета количественных отношений рукописных разночтений и других расхождений. Учтены также композиционные, каллиграфические, орфографические и другие внешние признаки различных списков Библии, сличенных с основным экземпляром текста.

Окончательный результат классификации получается в итоге последовательных действий вычисления основных количественных показателей. Приводятся формулы и определяются основные понятия, используемые в статье, с указанием причин и обстоятельств возможных расхождений с принципами и схемами метода многопризнаковой классификации рукописей.

Установлены четыре группы армянских рукописей Библии (I—IV), объединяющие соответственно 39, 19, 7 и 11 рукописей. Приводятся схемы групп генетически родственных рукописей, а также общая схема подлинника и редакций текста Библии с соответствующими армянскими переводами и их рукописными группами.